

李文忠公奏稿

李文忠公奏稿

卷之十七目錄

擬奏劉銘傳督辦陝西軍務摺

同治九年十月初三日

沈保靖獎案請敕部註冊片

同治九年十月初三日

會商銘軍赴陝分撥各軍摺

同治九年十月二十四日

請撥定有著的餉片

同治九年十月二十四日

商調林之望呂耀斗赴銘軍片

同治九年十月二十四日

裁併通商大臣酌議應辦事宜摺

同治九年十月二十六日

奏保陳欽沈保靖片

同治九年十月二十六日

籌議天津機器局片

同治九年十月二十六日

議覆練軍長夫片

同治九年十月二十九日

動用協餉修築南運河片

同治九年十月二十九日

添募樂字營營制章程摺

同治九年閏十月初六日附清單

河運艱阻請督催驗收片

同治九年閏十月十二日

遵調宣化練兵協防庫倫摺

同治九年閏十月十六日

接辦洋務片

同治九年閏十月十六日

酌議津海關道章程摺

同治九年十一月初六日附清單

開拓機器局片

同治九年十一月初六日

練軍協防庫倫酌給皮衣片

同治九年十一月初六日

籌設糧臺分別支應摺

同治九年十一月初六日

州縣留支等款請發十成實銀摺

同治九年十一月初十日

出口征兵請擇要駐紮摺

同治九年十一月十六日

烏城防剿請近調蒙兵片

同治九年十一月十六日

劉因請從祀文廟摺

同治九年十一月二十二日

籌議天津設備事宜摺

同治九年十二月初一日

迎議日本通商事宜片

同治九年十二月初一日

截留京餉摺

同治九年十二月初一日

酌議變通永定河工程摺

同治九年十二月初二日
附清單

會議變通驗收海運漕糧摺

同治九年十二月十六日

李文忠公奏稿卷十七

全集一之十七

桐城吳汝綸編錄

覆奏劉銘傳督辦陝西軍務摺

同治九年十月初三日

奏爲欽遵

諭旨斟酌機宜通籌全局據實覆陳恭摺仰祈

聖鑒事竊臣於十月初一日承准軍機大臣字寄九月二十九日

奉

上諭前任直隸提督劉銘傳治軍有律疊著戰功此次一聞宣召
卽日兼程北來其忠勇報國之忱尤堪嘉尙現在津案已結無須
用武該提督年力正強豈可令其投閒置散因思李鴻章赴直時
已率郭松林周盛傳所部全軍東來僅留譚仁芳五營駐紮西安
此時甘軍勦匪正當喫緊陝省兵力空虛深虞該匪竄突若令劉

銘傳督辦陝西軍務振旅西征不特陝境可得安全卽甘軍亦可免後顧之慮似於大局較有裨益至楚軍與淮軍雖向不相習而陝事甘事各有責成料不敢各存意見也著李鴻章斟酌機宜據實覆奏如劉銘傳於西事不甚相宜或於他省軍務可期辦理有效之處亦著妥籌具奏該提督已於昨日召見俟李鴻章覆奏到日卽可明降諭旨其駐紮滄州及丁壽昌所帶銘軍已有一萬餘人加以駐紮直隸邊境之周盛傳郭松林等軍亦有一萬數千人兵數實不爲少以有用之兵置之無事之地徒耗餉需若以百戰勁卒遽予裁撤亦屬可惜著李鴻章通籌全局或酌留直隸若干以資拱衛或撥給劉銘傳若干以資剿賊其餘各營應如何分地布置之處並著悉心籌畫迅速具奏將此諭令知之欽此仰見聖主權衡緩急措置咸宜猶蒙

詢及芻蕘臣自媿駭愚敢不熟慮深籌直抒所見以備采擇竊念
軍興二十年來惟粵捻二逆竄擾最廣且久咸豐年間如向榮和
春德興阿張國樑等皆以武臣督師無效臣時往來諸軍中見其
兵將強弱不齊而主客多存意見因無地方之責也厥後官文胡
林翼以湖廣督撫肅清上游曾國藩左宗棠與臣以江浙督撫肅
清下游曾國藩胡林翼等募練楚軍臣募練淮軍專以選將練兵
爲急上下一心糧餉應手是以倖獲成功蓋粵匪爲踞賊督師非
兼地方則呼應不靈也至捻逆流竄數省先後亦數易帥勦流寇
與勦踞賊情形不同非僅疆吏所能辦淮軍於北路人地較宜故
亦倖獲成功今陝甘之回雲南之回貴州之苗起於仇殺而跡似
竊據皆無大志遠略亦邊疆之踞賊耳非能將兵而任地方者不
足以了之甘回跨連西北尤

國家切近之患其初多隆阿勦辦陝回最稱神勇惜中道戰沒未竟其用楊岳斌謀勇沈毅爲水師第一名將而局量稍褊狃令統率陸軍易南而北用違其才又值粵捻未平餉力難分軍多潰變於是陝甘蹂躪盡矣而楊岳斌亦憤不再出此兩失之道也劉蓉劉典皆帶楚軍迭任陝撫左宗棠繼往督師論者每謂楚軍宜於南而不宜西北曾國藩亦嘗爲是言然左宗棠每欲專用楚軍平回匪近因事機屢變稍參用雷正綰黃鼎金運昌傅先宗等而於他將仍齟齬不入現在圍攻金積堡屢破堅寨冀卽得手馬化澂一股若可殲除甘事當漸起色若甘軍稍振則陝事亦鬆似無須別遣一軍致左宗棠或生疑忌臣前赴陝本擬待秋後卽請撤歸者正爲此也茲

諭旨以陝省兵力空虛深虞該匪竄突擬令劉銘傳督辦陝西軍

務自係備豫不虞之計臣查劉銘傳智勇才略可當一面於軍事歷著成效久在

聖明洞鑒之中其治軍以操練紀律爲要愛民除害爲本至其意度豁達性情爽直能駕馭將士而使各盡力能決機俄頃而應變不窮近年辭官歸里折節讀書深明大義其志趣願爲

國家效死力雅不欲以武人自居陝省軍務如催修寨堡安插降回資遣散勇籌辦糧料轉運等事在在與地方交涉督師者號令黜陟不能必行動多掣肘以武臣臨之更難著力儻

聖意必責成以陝事似須破除常格兼任地方事權歸一該員從臣多年事事維持調護俾竟厥功今若遠出誠恐磨練未深致辜朝廷委任仍求

聖主隨時誘掖訓戒勿任他人牽掣排擠庶克陶成大器備異日

千城之用陝中楚勇尙多不甚得力欠餉既鉅裁遣爲難又分駐西安三原之譚仁芳七營係食鄂餉分駐潼關之馬德昭李承先各營分駐神木府谷之宋慶各營均食豫餉若令劉銘傳督師似可察度機宜就近調度其所部銘軍馬步一萬二千餘人丁壽昌現因補授天津道已飭交臬司劉盛藻兼統自應由劉銘傳帶往郭松林周盛傳兩軍前因豫省彰德糧食艱貴已調郭松林統武毅各軍移紮德州桑園督省購糧用罄已調周盛傳統盛仁各營移紮濟甯以就運河糧路臣既奉

命移督畿疆義應竭力捍衛自須酌留勁旅以固門戶卽中原各省大亂初平人心未定水旱災祲饑驅爲盜會匪游勇降眾到處勾結各國通商傳教又往往滋事遠近震驚綠營弁兵斷不足以禦大敵新募之勇多不可靠時局岌岌看似無事若一有事便慮

不支迴非道光以前承平景象可比實未敢謂爲已治已安也曾國藩赴任江南方與臣商調銘軍移駐徐州一帶請劉銘傳幫同整練江防如劉銘傳移師西向所有郭松林周盛傳等軍如何分地布置或撥給若干以資助剿並各省撥定額餉如何分濟之處均應俟此次奉

旨後劉銘傳回營曾國藩抵任再與籌商妥協次第奏明辦理所有欽遵

諭旨斟酌機宜通籌全局緣由是否有當謹據實繕摺由驛覆陳伏祈

皇太后

皇上聖鑒訓示謹

奏

沈保靖獎案請敕部註冊片

同治九年十月初二日

再臣前因候選知府沈保靖於皖鄂等省勦擒出力彙案保奏於同治七年八月初九日奉

上諭沈保靖著免選本班以道員留於湖北歸候補班遇缺前先補用欽此續經臣查明該員沈保靖係於丁憂期內調營當差據實補奏同治九年四月二十九日奉

旨該部知道欽此旋准部咨以該員沈保靖從征楚省係在丁憂期內原保摺內並未聲敘亦未先行奏調按照定章將前保獎案撤銷等因咨行前來臣查吏部照章撤銷獎案係爲恪守成規而該員沈保靖從軍多年艱苦剛明最爲得力計功請獎實無冒濫因臣督師追賊奔馳倥偬未經查例先行奏調致將獎案撤銷若不爲奏乞

恩施非特該員向隅且無以鼓勵人才而先時未曾奏調係臣疏忽之咎相應請

旨將臣交部察議所有原保沈保靖免選本班以道員留於湖北歸候補班前先補用之處可否仰懇

天恩敕部照案註冊出自逾格

鴻慈臣爲鼓勵戎行起見圖昧附片陳請伏乞

聖鑒訓示謹

奏

會商銘軍赴陝分撥各軍摺

同治九年十月二十四日

奏爲遵

旨會商劉銘傳酌派赴陝各營並郭松林周盛傳等軍分撥布置
詳晰覆陳仰祈

聖鑒事竊臣欽奉十月初三日

寄諭毛昶熙奏請銘軍留鎮畿輔酌撥數營爲劉銘傳親軍飭臣

妥籌辦理又奉初四日

寄諭劉銘傳迅赴天津與該督籌商一切郭松林周盛傳等軍如
何分地布置或撥給若干以資助剿均著會商具奏等因欽此仰
蒙

聖訓周詳籌畫備至感悚莫名劉銘傳由京抵津與臣再四商議
當將所奉初四日

恩諭勉勵成全之意詳細述知該提督感奮馳驅直圖報稱所部銘軍馬步二十八營恩信素孚誠如

聖諭應由該提督帶往俾資得力未便留紮直境秦中地廣兵單時虞隴賊回竄臣並添撥現紮德州之提督郭松林武毅馬步隊十營現紮保定之總兵徐邦道鄂軍馬隊二營陸續拔往陝西交劉銘傳節制調遣各該營所需餉項軍火及轉運采辦經費仍由臣春開所設湖北後路糧臺及揚州分局籌撥接濟前敵相去日遠西北糧運艱難應山劉銘傳沿途察勘派員設局節節轉輸該提督籌商粗定即於十月二十日自津起程至郭松林所部尙有武毅馬步十營查湖北襄樊一帶實爲南北要衝湖南現有伺匪滋事郭松林籍隸湘省其本任又係湖北提督應令迅帶該軍回鄂由督臣李瀚章商酌調遣人地最宜周盛傳馬步二十三營本

年由鄂入陝剿除北山上匪嗣隨臣來直先令暫紮山西平陽頃
又移駐山東濟甯終歲奔馳而整肅操防綏急可恃擬令作爲拱
衛畿輔之師俟劉銘傳郭松林各營分起遠去卽飭周盛傳移師
北渡再行擇要布紮次第奏

聞曾國藩前欲商調銘軍移駐徐州劉銘傳幫同整練江防臣於
十月初三日摺內具陳在案茲劉銘傳奉

旨督辦陝事臣既籌撥人秦之師又須兼顧北路不得已緘商曾
國藩以臣所部淮軍現有記名提督吳長慶統步隊八營分駐江
淮宿遷揚州蘇州等處前督臣馬新貽深爲倚重臣國藩平素亦
器許之或可聊資鎮攝所有會商分撥各軍謹繕摺由驛覆陳伏
乞

皇太后

皇上聖鑒訓示謹
奏

請撥定有著的餉片

同治九年十月二十四日

再西事之難難於兵將得力尤難於糧餉應手淮軍自七年秋開
捻平裁遣酌留精銳分防各省因將江蘇月餉減撥一半每年除
發米價雜款外僅放正餉九關從無籌給全餉之事臣今春奉
命援黔征陝姑就留鄂老營添募馬步需款益鉅節次奏蒙

恩准加撥每月湖北五萬四川三萬浙江山東各二萬江蘇鄂浙
督撫臣籌顧大局均蒙勉力如數協濟山東現始報解至七月四
川僅解兩批臣前在秦中糧食艱貴異常籌貼各營米價運腳幾
加倍徒深虞日久難繼此次劉銘傳西去尤慮糧餉掣肘中道趲
起卽拱衛畿輔分防江鄂各營亦皆關係大局此係有著的餉若
稍短絀必至貽誤軍情可否仰懇

聖恩敕下江蘇湖北四川浙江山東各督撫仍照原撥淮軍額款

按月如數源源解無稍缺誤以濟要需伏乞

聖鑒訓示謹附片具

奏

商調林之望呂耀斗赴銘軍片

同治九年十月二十四日

再劉銘傳督師赴陝糧餉營務及聯絡地方官紳在在均關緊要
必須得人助理查有前任甘肅藩司林之望樸誠廉愷深得民心
該員籍隸皖北與淮軍易於浹洽又熟悉陝甘情形翰林院編修
呂耀斗學識兼長結實可靠臣本擬奏調來直襄籌一切茲劉銘
傳虛已求賢臣與面商若調該二員往助當有裨益可否請

旨飭令林之望呂耀斗迅赴劉銘傳軍營贊畫戎機以資得力理
合附片陳請伏乞

聖鑒訓示謹

奏

裁併通商大臣酌議應辦事宜摺

同治九年十月二十六日

奏為欽奉

諭旨裁撤通商大臣歸併總督經管酌議應辦事宜先陳大略恭摺仰祈

聖鑒事竊

臣承准軍機大臣字寄十月二十日奉

上諭總理各國事務衙門奏遵議毛昶熙請撤三口通商大臣條陳一摺著照所議三口通商大臣一缺卽行裁撤所有洋務海防各事宜著歸直隸總督經管照南洋通商大臣之例頒給欽差大臣關防以昭信守山東登萊青道所管之東海關奉天奉錦道所管之牛莊關均歸該大臣統轄通商大臣業已裁撤總督自當長駐津郡就近彈壓呼應較靈並著照所議將通商大臣衙署改為直隸總督行館每年於海口春融開凍後移紮天津至冬令封河

再回省城如天津遇有要件亦不必拘定封河回省之制李鴻章
當懷遵此次改定章程將洋務事宜悉心籌畫海防緊要尤須通
籌全局選將練兵大加整頓楊村河西務王慶坨等處應否修築
礮臺撥營分駐均著該督酌度情形妥爲籌辦畿輔水利本宜講
求而畿東尤亟應如何設法宣洩以利農田著慎選廉能之吏次
第興辦至天津新鈔兩關稅務應否添設海關道一員專司其事
著李鴻章一併酌議具奏等因欽此跪聆之下仰見

朝廷因時制宜慎固封守臣以菲材渥蒙

倚畀調任畿疆方以不克勝任爲懼茲更兼管洋務海防事煩責
重深虞叢脞貽誤戰慄萬分除俟

欽差大臣關防頒發到日再行恭摺叩謝

天恩外臣竊維天下大勢首重畿輔中原有事則患在河防中原

無事則患在海防保定控扼河朔又居直境適中之地昔人於此
建置省城實得形要是以歷任總督均須駐省辦事總攬全局天
津偏在一隅似非督臣久駐之所惟自各國通商開埠公使駐京
津郡爲往來衝途尤爲京師門戶關係極重近因民教紛爭釀成
巨案地方官撫馭未善通商大臣又恐呼應不靈後患殊多不得
不思變計

諭旨准照總理衙門所議裁撤三口通商大臣洋務歸總督經管
並令長駐津郡整頓海防洵屬未雨綢繆之策臣前奉

旨駐津籌辦彈壓撫綏各事今值歸併通商事同創始法貴變通
自應久駐此閒逐漸經畫目前最急者須先添設海關道一員查
咸豐十年十二月閒崇厚由長蘆鹽政改授三口通商大臣職分
較卑按照條約並無載明通商大臣與領事交涉儀式往來公文

俱用照會平行迨崇厚升侍郎相沿已久礙難更改茲臣以總督兼辦又蒙

特頒欽差大臣關防各國和約載有專條未便過事通融致喪國體而啟外人驕慢之漸且臣曾兼任南洋通商大臣五年舊例尙在未可前後易轍計惟添設海關道比照各口現辦章程責成道員與領事官稅務司等商辦一切隨時隨事稟臣裁奪其有應行知照事件臣卽札飭關道轉行領事遵照至往來會晤儀節務皆斟酌適宜此等事理雖小動關體制不敢不慎又中外交涉案件洋人往往矯強有關道承上接下開論調停易得轉圜不獨常洋兩稅須人專管也向來地方添設員缺多就閒缺裁改各口關道並有兼轄地方之責查直省道缺各當要地無可改併天津道承辦海運每年南漕百萬石由該道陸續接運赴通煩難已極未能

兼任洋務致有偏廢相應請

旨准令添設津海關道一缺專管洋務及新鈔兩關稅務凡華洋交涉案件責令該道督同府縣各官認真妥辦並由直隸總督揀員請補俾可呼應得力如蒙

俞允請卽

敕部先行鑄給關防未盡事宜仍續行妥議具奏至選將練兵籌備海防一節尤爲目今要務綠營弁兵惰窳已久就中挑選加餉操練外貌卽似整齊實恐難當大敵此各省近來練兵通病不獨直隸爲然總理衙門奏令擇任將領自係至當不易之論往往百戰名將練勇則易爲力練兵則無成效者餉額有多寡人地有生熟又綠營文法太密牽制苦多不能盡廢其法與人而別開生面也臣國藩本年四月續奏馬步練軍章程經部議准似較從前營

制差強惟新舊練軍尙未一律兵多戀家遠調仍逃喫苦不慣其中情弊隨時整飭變通或者有神實用天津向練洋鎗隊大致可觀惟平日並不紮營臨事未敢深恃大沽海口南北礮臺最爲扼要而守兵過單守具亦未精備楊村河西務王慶坨等處均係由津進京要路將來應否撥營分駐修築礮臺以壯聲勢均當次第妥酌辦理臣前由保定赴津僅帶小隊兩哨昨因銘軍遠去業調駐省親軍鎗礮隊二營來津護衛並奏派記名提督廣西右江鎮總兵周盛傳統盛仁各營爲拱衛畿輔之師該軍行役經年甫抵濟甯擬令略爲休息整隊北來暫在景州滄州一帶屯紮操練以備應津案甫結民情不免觀望洋人尤多疑懼現兵船在此守凍臣姑以虛聲靜鎮徐圖布置使其相安至畿東水利自元時設官耕屯未幾復罷厥後建言雖多行之迄無成效蓋由北方天時

地利人事皆有滯礙難行之處崇厚前於軍糧城開墾渠田五百餘頃聞不久亦多淤廢容再察看妥籌試辦所有裁併通商大臣酌議應辦事宜先陳大略各緣由謹繕摺由驛覆陳伏乞

皇太后

皇上聖鑒訓示謹

奏

奏保陳欽沈保靖片

同治九年十月二十六日

再天津應添海關道一缺臣已另摺奏陳現值裁併更張之始所有新舊海關稅務及與洋人交接體制並創立章程一切事宜必須籌畫妥善方期經久無弊非熟悉洋務通達治體之員不能勝任查有四品銜

記名海關道刑部郎中陳欽前奉

旨署理天津府知府經曾國藩疊次奏保在案臣查該員心地正大才幹明通在總理衙門總辦多年於中外交涉情形洞悉本末研究入微因途次感受風寒在津請假調理未及遽赴署任若以該員補授津海關道銜缺相當於洋務尤為得力惟頃准總理衙門咨行奏調該員陳欽回京當差摺內奉

旨依議欽此自應欽遵轉飭知照臣亟欲求才助理妄思暫留陳

欽請

旨飭令署理津海關道俾臣督同該員籌辦經始章程俟洋務關務稍有就緒再飭回京儼猶不蒙

俞允查直隸現任候補道員中賢能不乏實無深悉洋務之人惟有前調隨臣營之湖北候補班遇缺前先補用道沈保靖江蘇江陰縣舉人廉正精細博物多聞向在蘇滬從事日與洋人交涉外和內勁通達大體其才器儘堪造就合無仰懇

聖恩准令借署津海關道兼辦機器局臣亦稍資指臂仍照河道員之例俟試署一年期滿察看如果勝任再行奏請實授通商非尋常事體津關當改設之時未便拘守例議可否懇

恩破格暫准通融辦理冀於時局有裨臣爲洋務需才起見冒昧瀆陳是否有當伏候

聖裁訓示遵行謹附片具
奏

籌議天津機器局片

同治九年十月二十六日

再欽奉十月十二日

寄諭天津機器局應如何斟酌添製開拓之處著李鴻章妥爲籌畫奏明辦理該督於此事講求有素務當督飭津局委員事事悉心研究將此中機巧竟委窮源庶可有裨實用等因欽此臣查製器與練兵相爲表裏練兵而不得其器則兵爲無用製器而不得其人則器必無成西洋軍火日新月異不惜工費而精利獨絕故能橫行於數萬里之外中國若不認真取法終無由以自強竊謂士大夫留心經世者皆當以此爲身心性命之學庶幾學者眾而有一二傑出足以強國而贍軍臣自愧智短力分迄無成就前在江蘇督撫任內創設上海金陵機器兩局分造輪船鎗礮火箭銅帽等件略有端緒歷年軍中撥用實利賴之惟馳驅在外未能躬

親督率嘗以有初鮮終爲懼洋鎗炸礮皆非洋火藥施放不能取
準而及遠臣軍每向西國購運其價較中國土藥微昂究不若自
製洋藥之多且便總理衙門奏令崇厚在津購辦機器設局造藥
足補南局所未備且隱寓防患固本之意極爲遠慮深謀其初不
得不雇洋人指授所望內地員匠學其器而精通其意久之自能
運用轉相傳習乃爲經久之道又凡仿製洋器每年所用工料銀
較之每年所出之貨必比采買之價稍貴卽稍貴亦係值得不爲
虛糜崇厚奏稱據密妥士云再添研藥機器三分則所出火藥可
增三倍較之采買卽可節省等語臣昨與成林親往該局查看面
詢密妥士又不敢據爲成說蓋其夸大之詞也惟該局規模粗具
垣屋尙須加修機器尙須添製火藥亦尙未開造自應就此基緒
逐漸擴充逐事核實非廉正熟悉而有條理之員不足與謀查有

湖北補用道沈保靖前經臣委令督辦上海機器局事事皆賴其
創制如雇用洋匠進退由我不令領事稅務司各洋官經手以免
把持定購外國機器貨料自擇各洋商評訂收貨給銀務取該國
發貨洋文單爲憑委員各有專司其冗食不究心者汰去之華匠
學徒按日點工給價無稍冒混立法最稱精善是以滬局開設數
年已造成輪船四隻洋鎗大小開花礮洋火箭等項接濟各軍應
用者均不下數千件出貨較多而用款並不甚費以視閩局專任
稅務司法人日意格津局專任領事官英人密安士將成尾大不
掉之勢似稍勝之沈保靖因臣平捻後軍器可減久任勞怨力辭
局務隨營差遣臣不得已緘商前兩江督臣馬新貽撫臣丁日昌
暫令道員馮煥光知府鄭藻如照舊接辦滬局頃以天津機器局
奉

奏稿十七
旨交臣籌畫辦理臣卽密屬沈保靖留心察度擬卽遵委該員總司其事該員再三固辭大抵關涉洋務自好者已不願爲洋務而又兼出納銀錢更多望而卻步隨俗則恐無實濟認真則必叢怨尤然惟其不願爲者乃可與有爲此等苦情諒邀
聖明俯鑒沈保靖與臣交近三十年歷明耐苦絲毫欺不苟實所深信可否請

旨飭令該員總理天津機器局事務以資熟手臣當偕同該員監管中外各員匠逐細講求悉心研究務期有裨軍用仰副
聖厪惟係已成之局牽涉洋人窒礙殊多更張不易密妥士屢次來謁臣諄諄誥誡以覈實利用爲要該領事人尙和平要好或可相與有成容再察酌妥辦並一切整頓開拓章程隨時督飭沈保靖相機籌議具

奏事關鉅要不得不據實詳晰質陳伏乞

皇太后

皇上聖鑒訓示謹附片具

奏

議獲練軍長夫片

同治九年十月二十九日

再直隸新練馬步各軍經前督臣曾國藩於本年四月間奏奉諭旨飭部議。臣到任後接准部覆比卽轉飭遵辦。惟查兵部議覆練軍步隊各營長夫一條內稱營哨各官既用伙夫所請四哨哨官各用長夫三名營官用長夫十二名未免過濫。應不准其雇用等語。臣查練軍營制原奏聲明比照勇營舊章參酌損益。冀可整軍經武。一變營伍廢弛之習。所定月餉雖較綠營舊制稍優。而參諸勇營章程支放各款計已蠲減不少。並無冗濫。緣湘淮各軍營制每五百人一營於伙夫之外均另有長夫一百八十名。誠以營中挖濠築牆等事雖責成兵勇亦須兼資夫力。而挑運軍裝子藥轉解糧料器械以及喂養馬匹析薪擔水一切雜差非有長夫無可分任。茲查練軍營哨官所用伙夫各止一二名僅能專供炊

擬平日既責令紮營操練若將營中雜差仍派兵丁充當勢必藉口誤操何國藩所擬營哨官准用長夫共二十四名實係減而又減在練軍各統帶營官方嫌其少未便再行剋減惜小費而致誤操防現屆冬令巡哨喫緊之際臣已飭各處練軍帶隊分往就近大路擇要駐卡巡緝以期將土匪練寒苦地方盜匪潛蹤如果試行有效當隨時設法激勵可否仰懇

天恩俯准敕部查照曾國藩原奏無論行營坐營官准用長夫十二名哨官准各用長夫三名以示體恤實於練兵定章有裨此外如有應行變通之處仍由臣妥細察酌續行奏辦所有酌增練軍長夫緣由理合附片具陳伏乞

聖賢訓示

人

動川協餉修築南運河片

同治九年十月二十九日

再前據天津道丁壽昌稟據南皮縣知縣李鵬展稟報本年六月二十八九等日風雨暴作河水驟漲致將該縣所屬南運河之馮家淺隄岸漫決五十三丈葦子廠隄岸漫決七十二丈田禾被淹受災甚重當經該道飭委候補通判丁肇元前往會同勘辦旋據開摺稟送共估需工料銀一萬四千三百餘兩稟請籌款撥發購料集夫趕緊堵築俾被淹各村及時補種以救民困等情前來臣查南運河兩岸隄工爲漕運田賦所關向年搶修經費歲需撥銀四千餘兩近來藩司以未奉戶部准給行知致未按年撥發茲南皮縣屬馮家淺葦子廠等處隄工漫口至一百二十五丈亟待興工堵築需費甚鉅非歲修工程可比現值司庫支絀異常惟查有前督臣曾國藩奏撥江海關月協直餉三萬兩聲明專爲直省整

軍治河之用經同擬加酌覈行飭藩司暨練餉總局在於此項協
餉內撥發銀一萬兩由天津道具領委員會同該縣認真興修毋
許稍有草率浮冒除俟工竣驗收飭令據實造報並先行咨明戶
工二部查照外所有動撥協餉修築南運河漫口隄工緣由理合
附片陳明伏乞

聖鑒謹
奏

添募樂字營營制章程摺

同治九年閏十月初六日

奏爲前督臣曾國藩任內添募馬步勇隊酌定章程恭摺續行奏
明仰祈

聖鑒事竊查本年四月間督臣曾國藩因秦隴軍事喫緊擬調原
駐張秋之銘軍赴陝隨勦惟直省兵力過單緩急難恃飭據甯統
銘軍題奏按察使丁壽昌委員分往江南徐宿安徽廬州等處增
募淮勇二營以期有備無患嗣委員題奏總兵李得成山徐曉等
處募齊樂字馬隊一營三哨於五月初六日成軍又記名提督趙
長發募齊樂字步隊一營於五月二十日成軍經營務處先後點
驗計挑撥輓勇勇丁五十九名疲乏馬五十九匹給資遣回其馬
步隊營制悉照銘軍定章各營口糧薪公車價長夫等項按月支
給係由江南協款內動放撥與直隸新舊練軍營制不同由練餉

局司道詳請

奏咨立案前督臣曾國藩未及覈辦移交前來臣查曾國藩添練樂字營馬步各勇並親軍小隊交丁壽昌統帶係爲增益兵力拱衛畿輔起見業於試辦練軍酌定營制摺內陳明在案嗣曾國藩赴津委丁壽昌署天津道所部樂字兩營三哨調往津郡紮營彈壓巡防尙爲得力應需餉乾卽照曾國藩原定章程辦理除分咨戶兵二部外謹繕清單恭呈御覽伏乞

皇太后

皇上聖鑒敕部立案施行謹

奏

謹將新募淮軍樂字馬步隊照銘軍章程弁勇夫暨月支薪公車價柴草餉需各數目繕開清單恭呈

御覽

計開

樂字營馬隊章程

營官薪水月給銀五十兩不扣建

辦公費月給銀一百兩不扣建

油燭月給銀二十五兩不扣建

車價月給銀一百兩不扣建

柴草月給銀八十兩不扣建

伙勇一名月給銀三兩三錢扣建

公長夫四十名每名月給銀三兩扣建

文武幫辦二員每月給銀十六兩不扣建

書識一名月給銀六兩扣建

獸醫二名每名月給銀六兩扣建

馬夫四名每名月給銀三兩扣建

伙勇一名月給銀三兩三錢扣建

督隊官五員每月給銀六兩扣建

伙勇一名月給銀三兩三錢扣建

長夫一名月給銀三兩扣建

哨官四員每月給銀二十兩扣建

護勇十六名每名月給銀四兩五錢扣建

書識四名每名月給銀六兩扣建

伙勇四名每名月給銀三兩三錢扣建

長夫四名每名月給銀三兩扣建

隊長二十員每員月給銀七兩五錢扣建

馬勇二百四十名每名月給銀四兩五錢扣建

伙勇二十名每名月給銀三兩三錢扣建

長夫四十名每名月給銀三兩扣建

營官幫辦獸醫共馬七匹哨官隊長等官其馬二十四匹督隊書識共馬十四合共馬四十一匹每匹月給馬乾雜款銀二兩八錢不扣建

馬勇其馬二百四十四匹每匹月給馬乾雜款銀二兩四錢不扣建

樂字營步隊章程

營官每月薪水銀五十兩不扣建

公費月給銀一百五十兩不扣建

車價月給銀一百兩不扣建

柴草月給銀一百六十兩不扣建

油燭月給銀三十兩不扣建

公夫七十八名每名月給銀三兩扣建

哨官四員每員月給銀九兩扣建

哨長四員每員月給銀六兩扣建

護勇二十名每名月給銀四兩五錢扣建

親兵什長六名每名月給銀四兩八錢扣建

親兵六十四名每名月給銀四兩五錢扣建

四哨什長三十二名每名月給銀四兩八錢扣建

正勇三百三十六名每名月給銀四兩二錢扣建

伙勇四十二名每名月給銀三兩三錢扣建

長天一百二名每名月給銀三兩扣建

河運艱阻請督催驗收片

同治九年閏十月十二日

再南省漕糧近因河道淤阻皆以河運爲畏途同治四五年間前
漕臣吳棠與臣在兩江總督任內曾經試辦兩次其時黃河大溜
尙在張秋八里廟上下築壩灌引較易爲力故能及早抵通交兌
厥後北淤南下黃流日徙而南現已至安山戴廟一帶距張秋三
十餘里夏令盛漲其分溜尙鋪及八里廟外若漕船屆期趕至猶
可乘漲駛入運河然計張秋以北黃水灌運每歲不過一二次每
次不過數日卽涸耳今年南漕誤期實由春夏久旱濟甯下至清
江運道淺阻重船不能挽上迫伏汛暴漲黃水內灌而運船無由
遽達及運船趕至而黃水驟已落枯此天時地利爲之非人力所
能強爭也江安糧道王大經督趨糧艘停止八里廟河下一月有
餘經山東撫臣飭屬百計挑挖欲引已涸之黃水再灌入運固知

徒費工力臣尤慮漕船久擱進退失據嗣改由張秋陸運臨清復
換船上駛津通雖稍糜費已屬幸事據報各起米船均抵通壩正
在陸續過閘惟大雪期近閘河凍結恐難全數運倉向例已到未
運之米應由南省委員覓屋存儲俟春融再運此次米船到遲事
出有因若仍拘守常例不稍通融竊恐以後南中不敢再辦河運
且糧道有督徵籌運之責本年運糧未竣礙難回省籌辦新漕兩
江督臣曾國藩江蘇撫臣丁日昌以臣熟悉南漕及運道情形前
次行時諄屬代催王大經速回籌辦新漕茲屆嚴冬糧船既經到
壩尙屬無誤公事應請

旨敕下倉場侍郎趕緊督催驗收如閘河冰堅其未運之米或由
倉場派員照數收儲候運卽令該糧道兼程回江以示體恤明年
江北漕船無論河運海運均須年內起辦不可再遲臣爲漕運大

局起見圖昧據實附陳伏乞
聖鑒訓示謹
奏

遵調宣化練兵協防庫倫摺

同治九年閏十月十六日

奏爲遵

旨調撥宣化鎮官兵馳赴庫倫協防酌發三箇月行糧並請
飭下察哈爾都統履備駝隻酌飭分起前進恭摺陳仰祈
聖鑒事竊臣欽奉閏十月初七日

上諭張廷岳等奏烏城戒嚴情形緊急請飭撥兵防守一摺賊勢
漸偏漸緊烏城兵力單弱戰守均不足恃脫有不虞則科布多等
處均形震動卽庫倫亦恐孤立無援必須迅撥勁旅以捍疆圉著
李鴻章調撥宣化鎮標糧鎗火鎗等項官兵一千名派委得力將
弁管帶馳赴庫倫俾資協守等因欽此又奉十三日

上諭錦不勒多爾濟奏賊匪撲陷烏城文盛等奏請飭直隸山西
發給征兵餉乾各摺片賊匪四千餘人於十月十九日撲犯烏里

雅蘇臺官兵未能抵禦旋即失陷前調宣化大同兩鎮官兵各一千名前赴庫倫防剿現在烏城既失庫倫情形亦屬喫重著李鴻章何璟迅即調派剋期前往該官兵徑由軍臺行走應需餉乾等項並著寬爲籌給令其自行備辦糧裹帶前進需用鍋帳等項一併備齊以免沿途缺乏直隸山西西北境並著李鴻章何璟確切偵探先事預籌毋稍大意等因欽此臣伏讀之下仰見聖謨廣運訓示周詳莫名欽佩遵即飛飭宣化鎮總兵王可陞調派得力將弁管帶官兵剋日起程馳往協守茲據王可陞稟稱擬在該鎮練軍內挑派馬隊營官兵二百名步隊兩營官兵各四百名共成一千名配帶隨用軍械飭令營哨各官趕製行裝加添皮衣派弁赴省請領餉乾帳房藥餌等項並據稟懇查照該鎮官兵從前出師換防成案由內外驛站支應車輛駝隻以利進行等情

除飭省局司道寬爲籌給該官兵等三箇月餉乾並應領帳房藥
錯等項俾資備辦並飭宣化萬全各縣照例應付車輛仍飭將所
派管帶將弁銜名暨分起起程日期據實稟咨查核外臣查庫倫
地處車臣汗部落中旗距宣化三千餘里正站應由張家口行走
經過之處皆係沙漠戈壁一交秋深天寒地凍水草缺乏是以向
來換防官兵須於春夏之交分起北行現值烏城失陷庫倫喫重
非尋常換防可比自應星速前往以資布扼惟時屆隆冬風雪閉
作該官兵等奉調出師口外蒙古臺站道途荒遠人煙稀少諸多
掣肘行營裹帶糧餉軍裝笨重異常礙難稍有缺乏必應援案由
各臺站酌給駝隻轆轤轉運俾可迅速前進至應如何分起行走
沿途如何預備駝隻接替運送始可不致遲誤擬請

旨飭下察哈爾都統趕緊酌核妥辦就近行飭該鎮轉飭管帶官

遵照並派熟悉情形之蒙古官嚮導俾不致迷失路徑此項官兵到庫後每月應領餉乾軍火若由內地領解恐誤軍食可否卽由庫倫防所查照定章接續支給並歸庫倫辦事大臣節制調遣以收臂指之助其直隸西北邊境雖距烏城尙遠烏合之賊似亦不敢深入仍由臣隨時確探妥爲籌備以冀仰慰

宸廑所有遵調宣化練兵緣由繕摺由驛馳陳伏乞

皇太后

皇上聖鑒訓示謹

奏

接辦洋務片

同治九年閏十月十六日

再臣欽奉九年十月二十日

寄諭現在情形天津洋務海防較之保定省防關係尤重通商大臣業已裁撤總督自當長駐津郡就近彈壓呼應較靈著將通商大臣衙署改為直隸總督行館每年於海口春融開凍後移紮天津冬令封河再回省城如天津遇有要件亦不必拘定封河回省之制等因欽此臣於閏十月十六日遵

旨開用關防接辦洋務大理寺卿成林卽於是日交卸料理回京署天津海關道陳欽亦飭於是日赴任接管天津新鈔兩關稅務惟向來稅項收儲通商大臣署內銀庫隨時照章核明支放此時添設關道諸事草創臣暫將通商大臣衙署改為直隸總督行館所有成林交到庫款俟盤清後先派員妥慎看守將來道署議定規

模再交該關道經管至天津教案大致雖已議結尙有俄國應抵兇犯四名該領事孔氣力求緩決現飭天津道丁壽昌署天津府馬繩武與之妥議容有定局再行

奏明請

旨酌奪英國賠堂及法國求卹傷亡教民兩項正在反復議商皆係案外餘波一時尙難清了津郡中外商民驚疑甫定市肆近頗興旺而外國兵船數隻仍在津河守凍未便稍涉疏虞現節過大雪封河在即此間諸務緊要甫經接手頭緒紛繁自應懍遵諭旨不必拘定封河回省之制從容靜鎮逐漸整理臣仍檄飭藩

司錢鼎銘將省署日行文件代拆代辦並飭在省司道會督營員慎密巡防遇有要事隨時飛稟酌裁並令正定鎮總兵譚勝達記名提督彭楚漢各帶所部練軍分巡省城西南一帶以紓游匪而

因冬防俟津郡一切布置略有就緒再酌度緩急情形以爲進止
隨時據實奏

聞所有現屆封河未能回省緣由附片具陳伏乞

聖鑒謹

奏

附議津海關道章程摺

同治九年十一月初六日

奏為遵

旨妥議新設津海關道未盡事宜酌擬章程恭摺具
奏仰祈

聖鑒事竊臣前於議覆裁撤通商大臣摺內請添設津海關道酌
議應辦大略欽奉

上諭其餘未盡事宜著李鴻章迅速妥議具奏等因欽此嗣又以
關道責任綦重先將舊用天津鈔關關防割發該署道陳欽祇領
任事附片陳明在案查天津添設關道原期遇有中外交涉事件
先由關道與各國領事官會商妥辦再行詳稟以歸簡易若事關
重大或關道與領事官意見不合未能妥速了結始稟請督臣核
示飭辦免致輒因細故便須督臣親身與領事官接見辯論蓋顯

示以照條約卽隱藉以維體制也惟津郡距京較近與各口情事稍異儼各領事遇事要求不遂所欲其進京覲瀆較爲便易雖未能強相禁阻亦斷不可稍涉推諉庶冀內外合力維持以全大局臣接辦之始卽劄飭該署道陳欽照會各領事凡有交涉事件均歸該關道專管遇事代爲轉詳各領事現已陸續照覆尙無異辭第念津郡各領事向與通商大臣辦事已久今改令與關道商辦固係遵照條約不能不允究難免微有輕視之心且督臣不能常駐津郡將來交涉事件惟賴關道操縱得宜方免別生枝節若不稍假事權非特洋人勢難駕馭亦恐地方呼應不靈遇事倍難措手臣前接總理衙門公函囑將新設關道一切章程仿照奉錦山海關道成案臣體察津海關情形與山海關間有不同自應略爲變通俾無窒礙連日督飭該署道妥籌熟議並經臣參酌各海關

舊章詳晰核定謹將未盡事宜酌擬七條開具清單恭呈御覽伏乞

飭下各該衙門迅速核議施行再事當創始法貴精詳如續行查出應議之件自當隨時分別奏咨以期周妥所有籌議新設關道未盡事宜章程緣由理合恭摺具

奏伏乞

皇太后

皇上聖鑒訓示謹

奏

謹擬新設津海關道未盡事宜開具清單恭呈

御覽

一管轄地方以專責成查新設津海關道若無管轄地方之權則文武軍民恃非本管遇事呼應不靈況自直省開埠通商各府州縣交涉事件所在多有更難劃分畛域擬請仿照各省督糧道管轄有糧各州縣之例所有直隸一省交涉洋人事件統歸關道管理其附近地方如天津府並所屬滄州天津靜海鹽山慶雲各州縣永平府並所屬灤州樂亭縣遵化州並所屬豐潤縣及順天所屬之甯河縣俱係沿海地方擬定爲關道專轄至沿海各口岸稅務有本歸該處州縣經管者仍照舊稽徵其距海較遠之各府州縣定爲關道兼轄遇有中外交涉事務地方官應就近通稟各該管上司批飭核辦俟辦結後併報關道查核以期周悉至專轄府

州縣尋常命盜錢糧案件仍照舊由各該管道員飭辦無庸由關道核轉惟中外交涉事件稟詳關道核辦兼轄府州縣凡遇通商事務准由關道檄飭遵辦儻有不遵檄飭並辦理不善之員均准關道據實指名揭參庶各屬不致掣肘

一兼辦海防以資彈壓查天津開埠設立海防添練洋鎗隊原以津郡爲京師門戶海防最關緊要前經挑取津通鎮協標弁兵習練洋鎗礮隊嗣山海東海兩關先後仿辦山海關道並照行營規制充統兵大臣翼長今津海關道管理洋務卽職兼海防將來若值督臣旋省海防各營須有文員會同鎮協鈐東方免別滋事端擬請仿照山海關道之例關道准充督臣海防行營翼長各營自都守以下均受鈐轄與海防統帶各員和衷會辦庶文武聯絡一氣不致隔閡

一頒給關防以昭信守查現用監督關防原只稍徵鈔關稅務今改設關道管理直隸中外交涉事件並新鈔兩關稅務以及鈐轄海防兵弁自應仿照山海東海兩關章程並照浙海關兼管海防兵備道名目擬請

敕部頒給辦理直隸地方通商事務兼管海防兵備道關防遇有關涉地方洋務及海防事宜均鈐用兵備道關防另照南北各海關章程刊換監督直隸津海關稅務關防其新關鈔關事件即用監督關防以清眉目所有現用鈔關監督關防俟奉頒後卽行繳銷

一核定缺分以昭慎重查直隸新設津海關道一缺係因地方洋務關係鉅要因時制宜未便拘執常例遷就貽誤應欽遵諭旨作爲由總督揀員請補之缺嗣後遇有缺出或於通省現任

道員內調補或於候補道員內請補或以現任知府請升應擇其
人地相宜者酌量補用升用由督臣專摺奏請如一時無可勝任
人員准於摺內聲明酌保一二員請

旨定奪俾收得人之效該道缺應請作為衝繁疲難四字最要缺
現署道員陳欽遵照部議俟試署一年期滿再照例題報實授
一修建衙署以符體制查天津東北門外三口通商大臣衙署本
係長蘆鹽政公署今遵

旨改為直隸總督行館關道自應另設衙署津郡城池狹隘乃前
明衛城舊基偏在運河南岸控扼殊不得勢又無閒房隙地惟郡
城東門外濱河地方有前長蘆薊永運同公所距總督行館較近
與紫竹林各國領事官住址亦不甚遠且在新鈔兩關適中之處
便於稽查擬暫行借作道署該公所曾經洋人焚燬屋宇傾圮須

加修葺領事各官時常來謁尤應稍壯觀瞻現委員撙節勘估興修所需經費在洋稅坐扣八分經費項下動支此項工程大半因舊修改與重新創建者不同擬請毋庸咨部題估房閒數目丈尺做法以免往返駁查稽延仍俟工竣後將用過工料地價核實開報惟此係目前權宜辦法城外地勢散漫無險可守將來宜就運河北岸闢築新城另建官署爲經久防患之計

一酌給養廉以示體恤查津海關道仿照山海東海兩關道管理常洋兩稅及中外交涉一切事務其俸薪養廉亦應照該兩關道支領數目每年支領俸銀一百五兩養廉銀四千兩定例俸銀在該省地丁項下動支養廉在該省耗羨項下動支惟直隸係缺額省分通省各官養廉尙有不敷別無可支之款擬請仿照山海關道章程按四季在於津海關洋稅坐扣八分經費項下動支如有

不敷再由洋藥釐捐撥補

一籌給經費以資辦公查津海東海山海三口通商事務現併歸督臣綜理公務甚繁所有前通商大臣幕友委員書差人等均所必需其薪水飯食心紅紙張等項應循照舊章開支由關道在月支經費冊內造報至新設關道辦理地方中外交涉並海防稅務各事宜所需各項經費亦應仿照東海山海兩關道奏定章程開支惟津郡爲進京衝途時有各國公使人等來往且所徵稅數比該兩關較多所需幕友委員書差人等爲數亦多其薪水飯食心紅紙張等項應准酌量加增核實支發俟逐款核定確數報部查覈儘遇有要需並不能預定之款仍照舊章隨時稟明督臣酌發統在八分經費項下開支由關道逐月按結造具細數清冊詳請咨銷以杜浮冒

開拓機器局片

同治九年十一月初六日

再天津機器局經臣奏奉

諭旨派道員沈保靖總理其事當即轉飭該道欽遵到局籌辦一切查該局規模粗就機器尙少日碾洋火藥僅三四百磅亟須添購礮器增建廠屋局界周圍六七里亦擬加築長牆以期慎密另於大清河北運河之閒擇地興造藥庫一所以便收發事屬開拓費用較鉅沈保靖逐項清釐講求工作嚴剔弊竇並在上海鐵廠調來熟練可靠員匠幫同照料所有該局經費務使涓滴歸公不准絲毫浮冒惟該局事件多與洋人交涉沈保靖又係隔省人員應派津海關道陳欽會同辦理庶支發稅項造銷冊籍可資分任而便稽核該關道亦藉以習練製器之法冀於時局有裨理合附片陳明伏乞

聖鑒謹

奏

練軍協防庫倫酌給皮衣片

同治九年十一月初六日

再宣化鎮奉調馬步練軍一千名前赴庫倫協防時值隆冬遠涉沙漠冰雪之地寒苦情形極堪憫念經臣核定每兵一名酌給銀二兩五錢爲置辦皮襖皮襪之需飭直隸練餉局照章籌發以示體恤茲據該局詳稱遵在江海關協餉項下撥發銀二千五百兩交該鎮領餉委弁解回就近置辦散放等情前來臣查出征官兵籌款置辦皮衣銀兩委因體念兵艱核實動支應准就款開除免造細冊以歸簡易伏乞
聖鑒敕部查照謹附片具
奏

籌設糧臺分別支應摺

同治九年十一月初六日

奏為

旨派員籌設糧臺宣化大同征兵應由本省撥給糧價吉林黑龍江察哈爾馬隊懇

恩飭撥部款分別支應恭摺仰祈

聖鑒事竊臣欽奉閏十月二十四日

上諭大軍進剿兵食最關緊要自應在察哈爾安設糧臺以資轉運著李鴻章卽飭口北道酌派妥員赴口設立糧臺所有征兵糧餉並采辦乾餼及需用軍火等項應需銀兩並著籌款撥給奏明辦理等因欽此當卽恭錄札飭口北道李斌欽遵籌辦據該道籌議應辦事宜請撥部餉稟覆前來臣查各路官兵調赴庫倫等處防剿該處素不產糧大軍雲集枵腹堪虞此次設立糧臺應以辦

糧爲急務其餘尙可從緩現計奉調馬步官兵五千名加以帶隊員弁隨征餘丁約及七千名每名照例日支口米八合三勺每月卽需米一千七百餘石宣化產米無多商販亦少必須分赴各屬采買應用一切購辦製造轉運腳價需費甚繁直省藩庫支絀異常旗綠各營兵餉積欠纍纍練軍一項專指部撥月餉尙不敷用更何從籌此鉅款惟該臺用項緊迫未敢稍涉遲緩致誤事機臣現飭練餉局司道將宣化征兵一千名籌給三箇月餉乾並備辦帳房皮衣等項該官兵放行以後其月需糧食采運費用若干仍由直接月如數籌撥解臺以資接濟至察哈爾吉林黑龍江馬隊兵餉本係由部籌撥文盛等已奏准部庫撥銀二十萬兩目前采辦乾餼裹帶糧餉足資應用以後口糧亟須預籌進濟擬懇

天恩飭部迅撥銀三萬兩交順天府升派員解交口北道專備察
哈爾吉黑各馬隊口外購糧之需至山西大同鎮官兵現由歸化
城出口歸綏木石糧臺支應防兵糧餉其大同征兵糧食軍火應
請

敕下綏遠城將軍山西巡撫飭山歸綏道辦運以免轉轍至各路
馬步官軍馳抵烏城庫倫以後除山後路各糧局購運糧藥外其
例支鹽菜馬駝乾等銀斷難由遠處籌放以致緩不濟急查烏城
現請餉銀五十萬兩庫倫亦請餉銀十萬兩原爲征兵之需所有
察哈爾吉林黑龍江官兵應領餉乾擬由烏里雅蘇臺參贊大臣
就近支給宣化大同兩鎮官兵應領餉乾仍查照臣前次奏案開
十月十八日所奉

諭旨由庫倫辦事大臣就近支發以免紛歧再軍火等項前敵需

用孔殷卽須分起遞解擬請

飭由工部先行籌給領用嗣後業經出口啟行各營請領糧食軍火應由統帶官隨時呈由察哈爾都統飭知張家口糧臺照例應付勿任稍有冒混用過銀數事竣核實造冊報銷再查烏里雅蘇臺被陷逾月續後賊情若何毫無確報烏合之眾食盡竄散亦在意中儻無大股嘯聚只須隨地搜擒征兵無須過多卽無庸專設糧臺徒滋糜費應請

旨通飭各將軍都統辦事參贊大臣相度機宜隨時據實奏辦沙漠寒苦糧運極艱若紛紛徵調兵到而賊已遠颺似不若兵少而餉可持久愚昧之見是否有當伏候

聖裁所有籌設糧臺分別支應各緣由謹繕摺由驛五百里馳陳伏乞

皇太后

皇上聖鑒訓示施行謹

奏

州縣留支等款請發十成實銀摺

同治九年十

月初一日

奏爲滙陳各州縣賠累情形仰懇

天恩准將留支缺額等款仍照前議統以十成實銀支發並請概免提解二成以資辦公而維大局恭摺仰祈

聖鑒事竊查前准戶部咨議覆直隸各州縣留支銀兩請免提解四成殊難照准酌擬自同治九年起改按八成留支其缺額俸工工料亦按八成實銀支發至咸豐八年以後留支項下應餘一成實銀飭提解司報部具奏奉

旨依議欽此鈔奏咨行遵辦等因當經前督臣曾國藩行司欽遵通飭各屬一體遵照去後旋據清苑大興宛平盧龍天津河間正定大名邢臺永年宣化等十一首縣會銜稟稱竊查直屬州縣留支及缺額俸工等款奉部議覆以現在旗綠各營兵餉祇發七成

實銀各州縣留支等項係屬雜款豈能獨優令自同治九年起准按八成留支缺額俸工工料亦按八成實銀發給並將咸豐八年以後長出二成實銀一併提解等因理宜祇遵曷敢再瀆惟其中窒礙難行有不得不陳明者查額設兵餉雖放七成然餉少兵弱難以得力因而抽練之兵仍須加給餉乾可見減餉並無實濟至若留支一項皆係散給窮苦佐雜清寒師生以及賤役貧民驛站夫馬之川按口如數支給辦公已形竭蹶一經剋減萬難支持是以歷奉減放章程各州縣因時勢艱難未敢以窒礙情形上達致礙全局雖名為減成實處處仍照十成發給以期無誤公事現在地糧既收全銀而以八成留支令將長出二成實銀批解各州縣既須暗貼二成發項又須明賠二成解款一發一解計須暗貼四成實銀爲州縣者無此私財卽難保不挪之公項故從前提解司

庫二成之說不免視若具文十餘年來並無實提實解之事非敢
抗違實係力有不逮其情不無可原惟懇仍照前議准將額設留
支及缺額俸工工料等項以十成實銀支發並連咸豐八年以後
長出二成實銀一概免其提解俾官役夫馬餬口有資公事可期
無誤各州縣無庸賠案亦不致虧空巨案等情由調任藩司盧定
勳確查屬實具詳請

奏到前督臣因查辦津案未及核辦移交前來臣查各屬留支及
缺額俸工工料銀兩經前督臣曾國沛

奏奉

飭部議覆准自同治九年起改按八成實銀給發但可設法支持
原不准一再請益惟是各屬存留銀內如祭祀一項大典攸關理
宜豐備此外散給窮苦佐雜清寒師生以及賤役貧民驛站夫馬

之用皆須按日支給計口授食不容絲毫短缺一經剋減飭提該州縣卽須賠貼四成實銀日久無術補苴勢必挪用正項與其參追於日後徒增懸欠莫若籌計於事前預杜虧挪況以應發之留支各省均准給十成直隸爲首善之區又著名瘠苦獨從苛減似覺偏枯近年災歉頻仍兵差絡繹據稱力難賠累委係實在情形曾國藩瀕行時諄諄以此項未經議准無以體恤窮員爲慮臣接任三月接見各司道府州縣無不同聲籲懇蓋州縣爲親民之官例所應得者靳而不予必於所不應得者妄肆誅求而民不堪命亦非

國家勸廉重祿之本意合無仰懇

天恩俯念直隸地方清苦准如所請仍照前議將額設留支及缺額俸工工料等項以十成實銀支發並連咸豐八年以後應提二

成寶銀一概免其提解以資辦公而杜流弊似於整飭吏治不無少裨理合據實瀝陳伏乞

皇太后

皇上聖鑒訓示謹

奏

出口征兵請擇要駐紮摺

同治九年十一月十六日

奏爲張家口地方不敷官兵棲止請

旨飭令現調吉林黑龍江馬隊暫行擇要駐紮俟口外臺站駝隻等項催辦齊集再分起出口恭摺仰祈

聖鑒事竊據口北道奎斌稟稱各路征兵赴口遵札轉飭經過地方官妥爲照料應付前進並於本月初五日親赴張家口查看該處地面窄狹宿店無多神機營派出之威遠精字營在彼分駐各店已不寬裕續到之外火器營兵尙須設法布置此項官兵係奉派赴口防堵刻難開拔茲復探得吉林黑龍江各起馬隊不日亦將到口查該處但可棲止之處均經神機營官兵分駐若吉林黑龍江各隊續到口外臺站驟難齊備勢須久駐等候必將無處容身且張家口爲俄商來往販運茶貨之所兵民雜處誠恐別滋事

端有礙商市查奉調宣化鎮練兵一千名前經該鎮王可陞派
中軍游擊譚興魁管帶頭起步隊四百名於閏十月二十三日拔
赴張城王可陞正擬親督後隊挨次進發接准都統文盛照會以
察哈爾頭起馬隊甫經出口臺站駝隻不敷柴薪難繼飭令暫緩
起程旋又照飭該鎮頭起駐口官兵折回宣化俟軍臺騎駝各項
催辦齊全再行知照分起前進大同官兵亦經文盛照會暫緩赴
口所有吉林黑龍江官兵稟懇

奏飭暫緩到口駐紮等情前來臣查核所稟係屬實在情形張家
口爲中外商賈聚集之所距賊甚遠本不宜多駐客軍致有驚擾
吉黑馬隊遠道疲乏既無帳房住宿勢須分駐民房客店該處有
神機營各隊駐防若添多兵不敷分駐恐有窒礙相應據情請
旨敕下察哈爾都統查明該官兵現抵何處飛飭暫行擇要駐紮

俟口外駝隻度羊蒙古包等項預備齊集再由文盛知會陸續前進俾免擁擠之患再查烏城竄匪早經回竄肅州該處現無大股賊蹤似祇須酌調官兵分駐協防但取人地之相宜不在兵數之多寡時值隆冬蒙地寒苦異常草枯水凍人馬難行無論各臺站駝隻柴薪運送供應實虞不給各兵忍凍耐飢卽勉強到防亦恐不能得力且口外數千里無處產糧自察哈爾至庫倫臺站卽可設法自庫倫至烏城臺站未能遽復似庫城亦不宜久駐多兵客軍遠涉日食米精專恃遠處購運接濟值此餉需支絀之際尤慮難於持久現在賊已遠颺烏庫軍情較鬆所謂各路征兵五千餘人除察哈爾各隊係口外之兵防口外之地最爲相宜其餘應如何酌量調防分別停止之處擬請
旨裁奪飭遵抑或

飭下該大臣等體察情形悉心妥籌奏辦庶可體恤臺站節省餉
綱臣愚慮所及合併據實瀝陳所有吉林黑龍江現調官兵擬請
飭令暫行擇要駐紮各緣由理合恭摺由驛馳陳伏乞

皇太后

皇上聖鑒訓示施行謹

奏

烏城防剿請近調蒙兵片

同治九年十一月十六日

再臣探聞竄降烏城賊匪係伊犁等處難民難回無所歸依勾結本處蒙民喇嘛滋事前設立布倫托海尙可招撫自布倫托海裁撤以後仍四散搶掠爲生現已逃竄等情如果屬實則此項難民難回必須設法就地安撫其蒙古滋事民人及各盟官兵均須及時彈壓整頓查定邊左副將軍福濟前在安徽四川等省督師防剿老成歷練洞悉機宜此次困守邊塞無兵無餉猝被失陷情有可原應請

旨飭查該將軍實在下落妥籌善後設防事宜或請

另飭熟悉口外蒙古情形謀勇兼優之旗員酌帶餉項馳往烏城署理將軍篆務查明應調防兵若干餉需若干主持一切奏明辦理據臣愚見口外蒙古各盟素稱勁旅駝馬糧帳皆所素具防剿

本地最爲相宜應於就地各盟中抽調勁旅籌給足餉及時認真
整練似較之遠調內地步隊及東省馬隊尤易得力而可持久且
以供應客軍之餉籌辦蒙兵亦省糜費是否當附片密陳伏乞
聖鑒訓示謹

奏

劉因請從祀文廟摺 同治九年十一月二十二日

奏爲先儒潛德未彰懇請從祀

文廟以昭曠典而興世教恭摺仰祈

聖鑒事竊據直隸紳士候選員外郎前翰林院庶吉士賀錫福廣西龍州同知鹿傳霖等聯名稟稱伏查咸豐十年大學士軍機大臣遵議從祀章程應以闡明聖學傳授道統爲斷若著書立說羽翼經傳真能躬行實踐者准各該省督撫奏請從祀等因竊考元集賢學士諡文靖劉因祖籍容城縣人當宋南渡之後南北道梗載籍不通元史稱因三歲識書長而深究性理之學思得如古人者友之作希聖解初爲經學究訓詁疏釋之說輒歎曰聖人精義殆不止此及得趙復所傳周邵程朱諸書卽曉然曰我固謂當有是也嘗評其學之所長曰邵至大也周至精也程至正也朱子極

其大盡其精而貫之以正也所著易繫辭說見於元史今已散佚
四書集義精要二十八卷靜修集三十卷俱收入

四庫全書伏讀

欽定四庫全書目錄稱盧孝孫采朱子語類文集編四書集義一
百卷讀者病其複雜因乃摘取精要以成是書又稱因文在許衡
吳澄之上而醇正不減於二人北宋以來講學而兼擅文章者因
一人而已是其著述羽翼經傳洵足闡明聖學史稱丞相不忽木
薦因於朝徵拜右贊善大夫後復詔爲集賢學士皆以疾辭元帝
歎爲古之不召之臣生平孝友廉介細行大節無一虧缺明儒薛
瑄稱其有鳳翔千仞氣象又稱其足以廉頑立懦孫奇逢采其言
行冠理學宗傳元儒之首是其躬行實踐洵足傳授道統元臣李
世安明禮部尚書王沂翰林院學士宋褰等累請從祀均格於時

議不行論者謂因渡江賦幸宋之亡不知因祖父以來世爲金元人於宋實無故主故土之誼渡江賦深心隱痛蓋王景略不欲滅晉之意孫奇逢嘗著文辯之公論已明無可疑議我高宗純皇帝欽定書目稱其爲北宋後一人迴在許衡吳澄之上醇正亦不減二人今二儒旣已從祀而因尙缺然未列明裡其闕明聖學傳授道統實與議定章程相符應懇奏請從祀文廟等情旋飭藩臬兩司覆核會詳請奏前來臣查元儒劉因理明學邃品正言純少存希聖之心晚裕靜修之誼紹斯文於南宋得程朱一脈之傳開正學於北方駕吳許諸賢之上若使昭祀宮牆允足馨香俎豆合無仰懇

天恩准以元儒劉因從祀

文廟以資觀感理合會同順天學臣鮑源深恭摺具

奏伏乞

皇太后

皇上聖鑒敕部議覆施行謹
奏

籌議天津設備事宜摺

同治九年十二月初一日

奏為欽奉

諭旨妥議籌辦天津設備事宜恭摺陳仰祈

聖鑒事竊臣承准軍機大臣字寄同治九年閏十月二十六日奉

上諭英翰所陳天津海防宜設水陸提督擇威望素著之大將畀

以斯任統其舊部作為提標兼轄海防水陸各營等語著李鴻章

斟酌機宜妥議具奏至所稱銘軍西去畿輔空虛請將淮軍調駐

海口並令沿江沿海暫緩撤防嚴行戒備等語著曾國藩李鴻章

會商妥議實力辦理等因欽此並奉鈔英翰原摺到臣伏查津案

雖經議結武備必須講求此中國百年之計非一朝夕所能為功

也咸豐己未庚申之際曾親王以忠勇宿將調集旗綠兵數萬人

歲糜餉數百萬經營海口迄至一蹶弗振蓋由彼此強弱情形未

能深悉而兩斧出之幾誤大局自與捻平後議者有謂乘此軍威
大舉復仇迨本年五月津事初起擺臂而爭又不知凡幾矣幸賴
皇太后

皇上堅持定見處以鎮靜俾內外諸臣得以從容譬畫將就息爭
今事定而議設備誠宜及時振作豈可隱忍苟安惟臣粗識夷情
默籌時勢無論以一中國敵數強國戰備固不易言卽以守局而
論必從籌餉練兵製器三端下手今天下全力耗於陝甘卽雲貴
尙不暇圖若海防江防認真整理欲求無懈可擊每歲至少必需
千萬以上從何措辦此籌餉之難也兵之不練由於餉之不給我
朝定制兵丁額餉極少不足以養戰士軍興以後各省停餉虛伍
現尙僅發五六七成不等虧苦太久欲如乾嘉以前尙有可用之
兵恐不遽得其有裁兵增餉或加練加餉者亦屬無幾以制內匪

向不可究而望其禦外侮耶此練兵之難也中國兵器遠遜洋人無智愚皆知之蘇直甫經設局購辦機器學習製造鎗礮藥彈雖比中土習用者較精而比之西洋新製瞠乎其後需之歲月或有進益若急求勝殊不自量又況有器而不皆能用用之而不盡其妙似是近日通病此製器練器之難也以上三者皆吾之內不足內不足而張皇於外以之虛喝敵人向不失爲兵機以之欺蒙

聖主必至貽誤

國事臣所萬萬不敢出此也惟是練軍練器本疆吏應辦之事臣自督師剿賊以來所日夜經營者惟此爲亟茲忝司拱衛兼理通商一息尙存此志何敢少懈但只能就目前兵力餉力竭力圖維盡心籌辦耳如英翰原奏所稱天津宜設海防提督兼轄水陸各營一節查天津自

國初已爲重鎮除設總兵一缺外雍正年間添設天津水師營以
滿洲都統統之專爲捕盜護漕又添設天津河標營以河道總督
統之專爲治河均與天津鎮相表裏其時並無海氛設官置戍不
厭詳備後雖以次裁併道光二十二年因敵船煽擾粵浙海防喫
緊改設大沽協副將一缺津鎮其添新兵四千七百名咸豐八年
又改設協標海口左右六營兵制漸增究未必有實濟同治初年
通商大臣崇厚就津沽通永鎮協標內疊次挑練弁兵三千餘名
操西洋鎗礮隊餉項隊伍技藝尙爲整齊自較原營額兵差
強惟未經大戰不習繁營誠恐臨事難恃且近始督令移駐營盤
稍費勞苦然奇鋤之事動輒需人又除調赴歸綏防剿外存營練
兵不過二千餘名只可徐爲整頓英翰摺內所稱專設海防提督
名位較崇按之舊制與現今事體似均相宜所部將士仍照勇隊

操防訓練不改從緣營章程亦與練軍規模相仿惟久著威望之大將既慮難得其選兼轄水陸各營則目前並無水師亦無多陸營兵事只論強弱似不專在職分虛設提督而無得力之兵應手之餉於事何裨臣故不敢輕議更張應俟隨時體察大局情形再行妥酌奏辦又原奏所稱銘軍西去畿輔空虛請將淮軍郭松林周盛傳兩大枝全調海口一節查郭松林所部武毅軍已分撥步隊十營交劉銘傳帶往陝西其餘馬步十營調回湖北因餉需缺乏又飭裁遣馬隊三營僅留步隊五營馬隊二營分防鄂境不得謂之大枝周盛傳所部盛仁各軍一萬二千人尙稱勁旅前因就糧濟甯屯紮操練冬寒地凍津沽營壘礮臺均不能施工曾飭該提督單騎來津徧察大沽北塘海口及津通各處形勢據稱畿東津南濱海一帶四野平曠一片荒沙海口礮臺但求土木興築均

宜不在兵數過多而後路數百里間必須重兵堅壘巨礮相望節節布置聯絡乃可自立不敗之地而爭勝於人若置重兵於海口荒灘鹹水之區後路聲援不厚稍有蹉跌誤事甚大目下兵力餉力既尙不能大舉該軍只宜移紮靜海滄州之間整肅操防以備肆應而作聲勢勿遽偪紮海口徒使彼族驚疑而我軍前後皆成孤立此危道也所言似是老成持重之見與臣意慮相符來歲春融應飭遵照相機籌辦抑臣更有陳者津郡形勝以水爲險當九河之下游今直境五大河俱匯於城外之海河而東入於海郡城獨在五大河及海河之南係前明衛城舊基狹陋尤甚前明以控扼薊遼爲要其城在河北則爲失險今日以控扼海氛屏障京畿爲要其城在河南亦爲失險此古今建置時勢之不同必宜量爲變通者也蓋洋船不能深入內河如城在河北我可憑河設險添

置礮臺礮船護衛城池較爲得勢。前於議獲津海關道事宜。摺內已聲明將來宜就運河北岸圈築新城。另建官署爲經久防患之計。迄今尚未奉

俞旨。據臣管見。此爲津郡設備第一急務。卽如咸豐三年。粵逆北竄。同治七年。捻逆北竄。津城危在呼吸。幸得外援。賊卽退否。則斷難久守。咸豐十年。海口失事。卽棄津城。夷氛直入通州。無可阻遏。皆緣有城無池。又不得控扼之勢。故也。今若據運河北岸。屹築一城。圍以礮臺。礮船兼用。子牙大清北運諸河之險。以鯁塞山津赴通之喉牙。只要布守得人。似較海口尤有依據。

京城亦多一遮蔽。惟人情可與樂成。難與圖始。南北運河之交市。靡櫛比約。計收買民地。定購磚料。鳩工庀材。必須事事格外堅實。規制宏遠。所需經費甚鉅。一時無可籌措。若失機會。亦殊可惜。臣

再四籌畫惟有各省解存津局練餉制錢百餘萬串現在戶部無
需提解可否准臣於此項內撙節動用核實籌辦俾濟要需伏乞

聖恩敕部覈覆施行所有欽遵

諭旨妥議籌辦天津設備事宜繕摺由驛覆陳伏乞

皇太后

皇上聖鑒訓示謹

奏

通議日本通商事宜片

同治九年十二月初一日

再欽奉閏十月二十六日

寄諭英翰以日本籲請通商恐貽後患殷殷以杜絕爲請此事因該國意嚮甚堅業已令其特派大員到時再與妥議條約自無再事拒絕之理至將來如何明定章程以期永遠相安著曾國藩李鴻章預行妥籌詳悉奏明庶臨時較有把握等因欽此仰見聖明於懷柔遠人之中寓思慮豫防之意欽佩莫名臣伏查日本古倭奴國在東洋諸島中風稱強大距蘇浙閩界均不過數日程元世祖以後與中國不通朝貢終明之世倭患甚長東南各省屢遭蹂躪史稱倭性桀黠初由中土禁絕互市明世宗時盡撤浙中市舶提舉司又不置巡撫者四年濱海奸人得操其利勾結導引倭寇遂劇自

國初朝鮮內附聲威震懾倭人固不敢越朝鮮而窺犯北邊亦從未句內奸而侵掠東南實緣制馭得宜畏懷已久順治迨嘉道年間常與通市江浙設官商額船每歲赴日本辦銅數百萬斤咸豐以後粵匪踞擾此事遂廢然蘇浙閩商民往日本長崎貿易遷寄居者絡繹不絕日本商人游歷中土亦多庚申辛酉後蘇浙糜爛西人脅迫日本不於此時乘機內寇又未乘危要求立約亦可見其安心嚮化矣今彼見泰西各國業與中國立約通商該國亦已與泰西各國立約通商援例而來似係情理所有之事該國向非中土屬國本與朝鮮琉球越南臣服者不同若拒之太甚勢必因泰西各國介紹固請彼時再立約使彼永結黨援在我更爲失計自不如就其求好之時推誠相待俯允立約以示羈縻前該委員柳原前光等來謁每稱西人強信該國通商心懷不服而力難

獨抗欲與中國通好以冀同心協力又華人在該國經商者西國領事每欲代管必須互定條約白為鈴束等語無論是否真心立言亦似得體嗣復呈交前通商大臣成林議約底稿一本大意總欲比照西國立約成例辦理明春該國使臣前來自須有一番辨論惟既允議約在先斷難拒絕於後計惟與承辦議約之員屆時相機妥議章程請

旨定奪似未便預立限制致有滯礙據臣愚見中外既定和約均宜各派官員往駐該國庶消息易通勢力均敵若有來無往聽憑該國使臣簸弄脅制究非長策近年奉

詔疊次派員往泰西各邦通好業與從前隔閡情形小異惟華人往西國者絕少中國暫未便派員久駐日本近在肘腋永為中土之患聞該國自與西人定約廣購機器兵船仿製鎗礮鐵路又派

人往西國學習各色技業其志固欲自強以禦侮究之距中國近而西國遠籠絡之或爲我用拒絕之則必爲我仇將來與之定議後似宜由南洋通商大臣就近遴委委員帶同江浙熟習東洋情形之人往駐該國京師或長崎島管束我國商民藉以偵探彼族動靜而設法聯絡牽制之可冀消弭後患永遠相安是否有當伏祈
敕下總理衙門核議施行所有遵議日本通商事宜附片詳悉覆陳伏乞
聖鑒訓示謹
奏

截留京餉摺

同治九年十二月初一日

奏爲通籌津郡海防軍餉入不敷出天津關本年京餉力難補解並懇預行截留同治十年分奉撥京餉俾濟要需恭摺仰祈

聖鑒事竊臣前准戶部咨稱奏催天津關本年欠解京餉趕緊依

限解京鈔片知照前來正在轉行核辦聞欽奉十一月二十五日

上諭戶部奏豫撥來年京餉一摺京餉關係緊要現經該部就各

省緩急情形斟酌動撥自應遵照奏定數目源源報解原單著鈔

給閱看至本年未解京餉經該部節次奏咨飛催現屆年終仍未

如數解清著各該督撫迅速籌解等因欽此遵卽恭錄轉飭遵辦

去後茲據署津海關道陳欽詳稱遵查津關庫存銀兩經前署通

商大臣成林奏報接收交代實存銀七十二萬三千四百餘兩又

成林任內續收各項洋稅銀十二萬三千二百餘兩洋藥釐捐銀

三萬四千六百餘兩東海關解到機器局經費洋稅四成銀五萬兩連前共銀九十三萬一千二百餘兩內除成林任內撥發賠償法國及教案獎賞賠修美國房屋山使隨員川資並提存備發撫卹俄國等項共銀三十二萬五千兩機器局經費銀四萬兩采買銅斤價值運腳等銀三萬三千二百餘兩支應局八九十閏十四箇月軍餉銀十三萬兩稅務司四箇月薪水銀一萬二百兩稅務司七成船鈔銀一千九十餘兩又陳欽任內撥發天津府請領法國教民賠償銀五千兩稅務司薪水銀二千五百五十兩機器局經費銀一萬兩天津道府找領賠修天津各教堂工程銀三千一百八十餘兩支應局十一十二兩月軍餉銀五萬兩通共開除銀六十一萬二千二百二十餘兩實計庫存銀三十二萬九百八十餘兩內八分經費僅存銀二萬二千二百餘兩留備冬臘正二等月新

關經費並修建關道衙署之用其洋稅四成銀二十九萬八千七百餘兩係崇厚任內奏明另存專備機器局經費別項不准動用之款現在機器局籌議開拓添置即須陸續動用未敢擅挪該道接任後正值封河收數無幾而應發款項仍難遲緩所有欠解京餉委係無可籌撥查本年春閒關庫存銀七十餘萬兩其時崇厚通盤籌畫向以入不敷出咨山前督臣曾國藩會奏將津海關應解京餉銀十五萬兩留撥津防月餉成林任內亦因六成洋稅動用將盡是以續請將指撥賠償撫卹等款抵除欠解京餉茲奉部文以僅撥過銀三十二萬五千兩即使另須籌備月餉銅價亦應續有徵收何遽無款可撥等語自係未將另撥機器局四成洋稅扣除分晰核算現在接收稅項支發糧運昨發支應局軍餉銀五萬兩除將存款全行動撥尚不敷銀一萬三千九百餘兩暫由另

款借撥詳請咨部在案若再補解京餉無法挪墊應請查核奏咨
仍照前議將本年未解京餉銀十一萬一千五百餘兩抵解開除
再統籌津海關六成洋稅洋藥釐捐加以東海關協餉運庫鹽斤
復價一年進款尙不敷支發津防月餉其來年京餉采買銅斤更
屬無從籌撥等情具詳前來臣查天津爲北洋通商總匯都城切
近咽喉關繫甚重自崇厚任內籌辦海防陸續練兵勇操習洋
鎗礮隊分駐津沽等處藉以拱衛

神京稍壯聲勢非僅如各處海口專爲彈壓中外商民者可比惟
兵旣添練餉亦漸增加以製器設防一切餉項專恃津關常洋等
稅爲大宗議者或謂通商已久稅項所入初無懸殊何致支發遽
形短絀且練兵製器創辦有年從前庫存各款尙有盈餘崇厚交
卸未久何以卽虞竭蹶是二說者臣亦嘗以爲疑迨本年閏十月

開選

旨兼辦通商事宜即將該關向年出入大數逐加考校溯查同治元年崇厚初練京旗各兵不過一千餘名是年尙有山陝協餉至三四兩年逐漸添練因餉項不繼奏留迎庫應解

盛京俸餉每月協撥銀一萬兩故五六兩年尙可敷用七年添練新練兵勇酌留雲字大沽等營礮船復經奏撥江西四川福建等省協餉銀三十萬兩又有湖北協餉數萬兩並截留七八兩年已撥京餉之天津常洋兩稅銀二十七萬七千餘兩多方接濟僅可支持嗣派鄧啟元劉景芳兩軍赴歸化等處防剿應支月餉仍由津郡解往兵數較前加至倍蓰餉源並無增添綜計崇厚原部津防練兵歸化防軍額餉及采買製造雜支等項每月需將近四萬通年計算卽需銀五十萬兩以六成洋稅計之不敷尙多至津局

製造機器甫由外洋購到現當礮藥加工之際需用浩繁應用各件接續添置專賴四成洋稅亦不能分濟餉需是本年庫儲短絀實由撥款較多兼以協餉久停無可挹注即使崇厚尙未交卸亦必支持不下現在疊奉

寄諭整飭海防臣查津郡至大沽等處尙須添設礮臺分駐勁旅內地應行設防處所亦應節節布置現存津城練兵僅一千八百餘名大沽礮兵九百餘名巡防鹽山等處馬隊四百名實屬不敷調撥本擬將派往歸綏之鄧啟元劉景芳兩軍檄令回津汰弱留強妥爲整頓祇以歸化城外接蒙古草地內界西北邊牆甘陝回蹤時虞竄越防務喫緊未便遽行撤調而月餉仍須代辦臣明知部庫支絀義應共體艱難苟其稍有騰挪何敢設辭短解惟處茲要地不能遽議裁兵又無術可以增餉再四籌思惟有據實籲懇

天恩俯念海防緊要准將天津關奉撥同治十年分京餉常洋稅銀十五萬預行截留俾資軍食其本年未解京餉銀十一萬一千五百餘兩並請

旨准照成林原奏在指撥賠償撫卹項下抵解開除如部議仍催解來年京餉應請將津郡撥防緩遠城之馬步鎗礮各隊另行指撥的餉以免貽誤所有通籌津郡大局擬懇截留天津關十年分奉撥京餉籌濟海防及歸綏月餉緣由謹繕摺由驛馳奏伏乞

皇太后

皇上聖鑒訓示謹

奏

酌議變通永定河工程摺

同治九年十二月初二日

奏爲永定河工程緊要擬變通整頓酌議章程請

旨遵辦恭摺仰祈

聖鑒事竊查永定河南北兩岸縣互四百餘里爲宛平涿州良鄉

固安永清東安霸州武清等沿河八州縣管轄地面該州縣經徵

河淤隙葺等租及派撥防汛搶險民夫在在均關緊要乃因河工

與地方不相統屬各存畛域之見日久玩生以致地租積欠日多

民夫抗違包折種種情弊疊經歷任督臣嚴札飭辦而該州縣等

視爲具文往往虛應故事甚至大汛搶險及堵築漫口大工購料

覓夫正當喫緊之際近隄居民居奇勒捐索要重價該地方官因

無協防之責置若罔聞在工各員呼應不靈事事掣肘因之債事

者不少經臣飭據永定河道李朝儀查明實在情形稟請覈辦前

來臣查永定河偪處近畿因疏通水道拱衛

京師是以專設河道督同廳汛各員隨時修築並歸直隸總督兼
轄遇有潰漫例議纂歲沿河州縣應徵河淤隙葺等租均應按年
清解伏秋大汛一遇險要工程卽應派撥民夫趕緊搶築乃地方
官日久玩生應解地租既多積欠遇有要工復不認真督勸以致
人夫短少料物奇貴貽誤非輕近來河身淤墊日高陡岸坍塌日
甚苦無巨款可資修濬連年漫口雖經設法堵築每遇大汛仍虞
壅潰必須及時通力合作冀可挽救於萬一各該州縣恃非河道
統轄又河工決口地方官例無處分相率諉卸銅弊殊深亟宜因
時變通求盡人事伏查南河東河河工道員皆兼管轄地方沿河
州縣皆有協防之責永定河爲畿南保障水利民生關係尤鉅自
應仿照變通酌辦擬請

旨飭將宛平等八州縣除錢糧詞訟及地方一切公事仍歸該管
通永霸昌兩道覈辦外其有交涉河工地租民夫及修防事宜均
責成各該州縣認真協同廳汛各員辦理統由永定河道考覈果
能實力奉行著有成效安瀾後准由該道彙請獎敘儻有玩忽等
事准卽據實稟請參撤如各汛員有賣放汛夫干預地方藉端刁
難等弊亦由該道嚴查揭參著爲定例庶幾呼應較靈不致再有
推諉除將應辦事宜酌議章程四條繕具清單恭呈
御覽相應據實籲懇

天恩俯念該工關係緊要准照所議辦理於水利巡防均有裨益
所有現擬整頓變通永定河務緣由謹會同兼管順天府府尹臣
萬青藜署順天府府尹臣王榕吉會詞恭摺具陳伏乞

皇太后

皇上聖鑒訓示謹

奏

御覽

謹將酌擬整頓變通永定河務章程繕具清單恭呈

計開

一沿河州縣徵河淤地租及香火葦隙等租原爲永定河辦公之費近來各州縣積欠纍纍任催罔應以致辦公掣肘應請定限嗣後以解至八分爲率如解不及數者由永定河道查覈揭參並提承辦書役究追

一每年派撥民夫上隄積土防守險工近隄各村莊例有額設名數不准短少及以老弱充數乃日久弊生鄉地書役往往有包折等事以致無知鄉民藉端抗違應請責成沿河州縣循照舊章如數派撥儻有包折等弊從嚴懲辦該管汛員如查有賣放者由永定河道查辦嚴參

一沿河州縣本有地方之責應於伏秋大汛時各就該管地面協同防守其有距隄較遠及南北兩岸不能兼顧者應於大汛時選派幹役在近隄村莊常川駐守督催鄉地糾集民夫遇有搶險等事卽速上隄搶護該管州縣仍隨時稽查彈壓至宛平縣駐紮京城相離爲遠不能親到應責令盧溝橋龐各莊兩巡檢就近經理統歸永定河道考覈

一伏秋大汛遇有搶辦險工及堵築漫口大工之時購買料物雇覓人夫最爲緊要乃附近居民往往於喫緊時居奇勒捐不特多所糜費甚至觀望遲誤應由永定河道行知該地方官出示曉諭從中酌定不准任意擡價亦不得抑勒苛派以示公允

會議變通驗收海運漕糧摺

同治九年十二月十六日

奏為遵

旨會議變通驗收海運漕糧事宜恭摺陳仰祈

聖鑒事竊臣承准軍機大臣字寄同治九年十一月二十日奉

上諭戶部奏變通驗收海運漕糧及海運仿照河運章程辦理各摺片南省漕糧由海運津歷年以來因津郡無地方大吏駐紮特派人員前往驗收茲據該部奏稱通商大臣現已裁撤直隸總督常駐津郡請自同治十年為始凡天津驗米事宜均山直隸總督就近經理無庸另派大員前往驗收至倉場侍郎應否仍照向章一員赴津會同查驗並通州收米事宜可否責成留通倉場侍郎一手經理無庸另派大員請飭妥議等語著李鴻章英元喬松年按照該部所奏各節會同妥議具奏其一切章程仍應悉照成案

妥辦至海運交卸一節該部擬請按照河運章程改由糧道赴通
徑交係爲埽除積弊起見著曾國藩李鴻章英桂張兆棟張之萬
楊昌濬斟酌情形詳細妥商會同核議具奏原摺片著鈔給閱看
等因欽此臣查天津驗米事宜向因津郡無地方大吏駐紮是以
欽派大臣赴津驗收今直隸總督兼辦洋務奉

旨每年於海口春融開凍後移紮天津自可就近經理督同南省
交米之糧道管理剝船之天津道稽查整頓呼應易靈應如部
原議毋庸另請

欽派惟驗收漕米事極瑣屑繁重近年海運米多船少往復需時
起剝赴通尤多周折總督責任地方儻遇有緊要事件或須暫行
回省料理卽在津兼籌申外交涉各事亦未能專顧一端似應仍
照向章倉場侍郎酌派一員赴津會同查驗其通州收米事宜並

可由留通倉場侍郎經理勿庸另請大員俾歸簡易當經移咨倉
場侍郎會議去後茲准銘安喬松年咨覆天津驗米應請屆期仍
奏派倉場侍郎一員來津會同查驗一切章程均循照舊章辦理
至通州驗收轉運本係倉場專責向來

欽派大員只係會辦並非有分任之事如停止派往亦不致於貽
誤擬請奏明停派等因臣查明春節候較早正月半前津海即可
開關江浙運船頭批放洋抵津必速應請

敕下戶部先期奏派倉場侍郎一員早日來津會同籌辦以昭安
慎其通州驗收轉運即責成留通倉場侍郎一手經理與臣等互
相商推釐剔弊端亦毋庸另請

欽派大臣以免推諉至海運按照河運章程改由糧道赴通徑交
一節洵為埽除積弊起見惟查歷辦海運起剝米石分批到壩津

通兩處在事文武不下二三百人從前河運漕糧每船有旗丁承
管運員只管催趲彈壓近來試辦河運雇用民船每船改用委員
承管然江北四五萬石之米已用該省委員二十餘人長途不無
糜費今蘇省海運漕糧一百餘萬石由津過船起剝押運赴通需
添員弁尤眾若由蘇浙遠帶來津盤費太鉅若借用直省員弁鈐
制較難卽此事已有窒礙此外如戶部所稱經紀剝船中途舞弊
積習相沿臣等尙慮不能驟爲禁絕各糧道出境辦事權力更所
不逮且南省趕辦海運爲期已迫明年新漕似只能照章在津驗
收將來如何改令糧道赴通徑交應由江浙各督撫自行察核妥
辦臣仍隨時會同商酌並俟下屆押運各糧道來津面與籌諮體
察情形再行定議覆

奏所有會議變通驗收海運漕糧事宜理合會同倉場侍郎臣銘

安倉場侍郎臣喬松年合詞繕摺由驛具陳伏乞
皇太后
皇上聖鑒訓示謹
奏

李文忠公奏稿卷十七